

Un hecho historico

Prome biaha Aruba tin defensor di pueblo cu a participa n'e conferencia anual di Ombudsman di Reino

E aña aki Aruba tawat'e Cede di e conferencia



DURANTE dianan 13 te 15 di januari 2025, Aruba tawata Cede di e Conferencia anual di Ombudsman di Reino. Durante e conferencia, e Ombudsmannan, e Defensornan di Pueblo, a dialoga tocante e desaroyonan mas importante pa Reino y relevante p'e trabou di Defensor di Pueblo. Diaranson mainta, Vice Premier Xiomara Maduro a ricibi e Defensornan di Pueblo na Bestuurskantoor unda a dialoga riba varios punto importante di e trabou di un Defensor di Pueblo.

Prome Minister Evelyn Wever-Croes ta indica cu a trata di un echo historico, pasobra ta pa prome biaha Aruba tin Ombudsman, un Defensor di Pueblo cu ta participa n'e conferencia. Historico tambe, pasobra Aruba tawat'e Cede di e conferencia e aña aki.

Presente p'e conferencia tawat'e Defensornan di Pueblo, di Aruba, señora Jurima Bryson, Corsou, señor Keursly Concincion, St. Maarten señora Gwendolien Mossel y e Ombudsman Nacional señor Reinier van Zutphen.

En conexion cu e conferencia aki, dia 14 di januari anochi, na Kapel Maria Convent, Universidad di Aruba a organisa un charla 'De rol en betekenis van de Ombudsman'. Durante e anochi aki e Defensornan di Pueblo a presenta kico t'e trabou di un Defensor di Pueblo y a splica loke esaki por significa p'e ciudadano. Universidad di Aruba a organisa e charla aki pasobra e trabou di un Defensor di Pueblo ta nobo pa Aruba y asina por a informa pueblo kico e servicio di un Defensor di Pueblo ta encera. Tambe riba e mesun diamars mainta, Su Excelencia Gobernador di Aruba, señor Alfonso Boekhoudt, a ricibi e Defensornan di Pueblo di Reino pa un audiencia na Cas Ceremonial di Gobernador.

"Esaki t'e prome salida oficial di e prome Defensor di Pueblo



di Aruba, Ombudsman Jurima Bryson. Y e conferencia aki tawata un bon oportunidad pa a cera conoci cu e Defensor di Pueblo di Aruba. Desde cu nos a drenta den Gobierno, nos a traha duro pa Aruba tambe logra haya su Defensor di Pueblo y mi ta sumamente orguyoso cu nos a logra", Prome Minister a expresa.

